

■ CONVIVENZA

Avais Vus gugent ovs da dinosauriers? Pertge betg?

DA CLAUDIA CADRUVI*/ANR

Jau emplenesch gugent ora questiunaris per studis scientifics. I ma dat in bun sentiment – il sentiment da pudair servir a la scienza. Sco Rumantscha han ins savens la chaschun d'emplenir ora questiunaris, pertge ils Rumantschs vegnan gea perscrutads ch'i tut schloppa.

Tschel di hai jau puspè chattà in questiunari en mia posta electronica. Jau hai immediat cumenzà a far cruschinas. Tuttenina è mes schlantsch da responder a las dumondas vegnì franà. «Quant savens discurris Vus rumantsch grischun cun Vossa famiglia?», vulevan ils perscrutaders savair. «Avais Vus abunà ina gasetta scritta en rumantsch grischun?» Jau hai deponì il questiunari en il chanaster da palpìri electronic.

Pertge na fan perscrutaders atgnamain betg studis pli divertents, sch'els tschentan gea tuttina mo dumondas da fantasia? Ins pudess per exempel ina giada perscrutar «Ils Rumantschs e lur preferenzas pertutgant il consum dad ovs la dumengia d'ensolver». Sche jau avess da far il questiunari per in tal studi formulass jau las suandantas dumondas:

Mangiais Vus ovs la dumengia d'ensolver? Consumais Vus ovs mo la dumengia u era durant l'emna? Avais Vus pli gugent ovs cotgs, ovs engalads, ovs sbattids, ovs en paintg u ovs crivs? Preferis Vus ovs-giaglina, ovs d'auca, ovs da quacra u ovs da dinosauriers? Avais

Vus insumma gugent ovs da dinosauriers? Pertge betg?

Essas Vus da l'avis che ovs da dinosauriers sajan malsanadaivels? U cartais Vus ch'els sajan nunecologics? Cuntegnan ovs da dinosauriers tenor Voss manegiar memia bler colesterin? Gustan els memia fitg da zulper? Avais Vus fatg nauschas experientschas cun mangiar ovs da dinosauriers? Essas Vus ina giada stads constuppads suenter il consum d'in ov da dinosaurier? Quant ditg duvrass Vossa famiglia per mangiar in ov d'in dinosaurier? In di? Dus dis? Trais dis? Quatter dis? Circa in'emna? Anc pli ditg?

L'evaluaziun d'ina tala Lretschertga pudess suenter tunar circa uschia: Ils Rumantschs prefereschon da mangiar ovs-giaglina la dumengia d'ensolver. Els refusan datschertamain il consum dad ovs da dinosauriers. Dals 1021 pledaders e pledadras da lingua rumantscha che nus avain interrogà cun noss questiunari n'inditgeschonganca in sulet ch'el mangia ovs da dinosauriers. Quai è in cler indizi per la tenuta sceptica dals pledaders da lingua rumantscha visavi ovs da dinosauriers.

Ils motifs per la tenuta negativa èn multifars. Malgrà che blers interrogads n'inditgeschan naginas raschuns per desister dal consum dad ovs da dinosaurier sa resulta tuttina in cler trend. Pliaras pledadras femininas da lingua rumantscha èn da l'avis ch'ils ovs da dinosaurier cuntegnan memia bler co-

lesterin. Tar ils pledaders masculins giogan ils aspects ecologics ina pli gronda rolla.

Il gust da zulper percunter na para betg da disturbar ils pledaders e las pledadras da lingua rumantscha. Bleras famiglias inditgeschan ch'ellas pudessan sa nutrir in'entira emna d'in sulet ov da dinosaurier. Tuttina resta la sceptica visavi questa sort ovs enorm gronda. Ovs da dinosauriers na vegnan mai a chattar l'accoglientscha tar ils Rumantschs, sco quai che noss studi scientific demussa.

* Claudia Cadruvi è redactura tar l'Agentura da novitads rumantscha (anr) e mamma da trais uffants. Ella è creschida si a Cuira e viva oz ad Uznach en il chantun da Son Gagl.

Vocabulari

questiunari	= Fragebogen
emplenir ora	= ausfüllen
cruschina	= Kreuzchen
schlantsch	= Eifer, Elan
frantar	= bremsen
perscrutader	= Forscher
ensolver	= Frühstück
ovs engalads	= Dreiminuteneier
ovs sbattids	= Rühreier
ovs en paintg	= Spiegeleier
ovs crivs	= rohe Eier
giaglina	= Huhn
auca	= Gans
quacra	= Wachtel
malsanadaivel	= ungesund
gustar	= schmecken
multifar	= vielfältig
zulper	= Schwefel
sa nutrir	= sich ernähren
accoglientscha	= Akzeptanz

Die Kolumne «Convivenza» erscheint in der Regel am Montag in der «Südostschweiz» und in der romanischen Tageszeitung «La Quotidiana». Unterstützt wird das Projekt von der romanischen Sprachorganisation Lia Rumantscha. Für Leserinnen und Leser, die nicht Romanisch verstehen, gibt es im Internet eine deutsche Übersetzung, und zwar unter www.suedostschweiz.ch/communitiy/blogs/convivenza.